

萬有文庫

第二集七百種

王雲五主編

洪北江詩文集

(一十)

洪亮吉撰

商務印書館發行

洪北江詩文集

(一十)

洪亮吉撰

國立學基叢書

更生齋詩卷第五

箬嶺授經集

勵志詩三十首

獨木可製棟。乃反裁作橋。獨木之橋。心焉搖搖。獨木可立柱。乃反刳作舟。獨木之舟。或沉或浮。天形不知。以農爲師。地圖或濶。引商參問。欲知古詢。及賈欲通俗。訪及僕。羅網待物。不擇飛走。資格縛人。不問賢否。

慢神無福。諂亦如之。不慢不諂。是爲得之。學佛無益。毀佛無損。不佞不毀。達人所允。萬燈雖明。不敵一星。九流雖精。不敵一經。星晶瑩。海宇寧。經習熟。治術足。薺佐飲。菸佐食。腸浸淫。口呼吸。一火攻。一水厄。消肌膚。鑠精液。

一家飢寒。擾及里鄰。四民飢寒。憂及君相。

靈狐狼狽。善惑世人。神祠穴久。不媚土偶。林禽剪舌。巧過百物。有法制之。禦以木訥。身欲死。藥不靈。心欲死。語不經。語不經。神殛之。藥不靈。鬼殺之。

我欲上天。祇憑一梯。天之高高。梯則已低。我欲渡河。祇結一壺。河流湯湯。壺不可貯。

以力養人。力懼不展。以心養人。活及無算。以財濟世。財有匱時。以言濟世。利無窮期。妄思奇福。必得奇禍。妄思窖金。必至家破。

龍行雨。聲不聞。龍出聲。雷卽噴。鵬搏風。翮不露。鵬奮翮。天卽怒。

我所思在九域以外。九域旣窮。天地何屈。我所思在萬物之究。萬物旣究。孰持其後。心無欷傾。不畏雷霆。行無疵累。不畏社鬼。社鬼所搏。必非強梁。雷火所觸。人或不祥。齊三士。可稱勇。伏劍死。不旋踵。魯兩生。可號儒。叔孫先。不能污。齊三士。誰可敵。田橫島。五百客。魯兩生。孰可同。哀平中。楚二龔。

衣無複單。難以禦寒。家無法紀。難以服官。衣之有複。潤及肌肉。家之有法。化及鵝鴨。惠人升斗。莫惠以口。殺人刀戟。莫殺以舌。口惠人。怨必叢。舌殺人。已必凶。

妖禽九頭。妖狐九尾。顧首顧尾。不見可喜。扑黿斷足。形天斷頭。時起時舞。不見有憂。盜賊水火。不過家破。飢寒困窮。一身之凶。妒賢嫉能。殃及孫曾。利己害物。禍至殄滅。環堂而行。跬步有幾。行之不已。可積千里。索書而觀。書苦易竟。循環讀之。義乃不盡。欲身不病。無與物競。欲身無災。與物共財。

檻虎縱馴。不使導遊。吾誰與偕。岸有白鷗。籠禽雖俊。不與論心。吾誰款曲。案有素琴。

不隨俗。可挽俗。不趨時。乃揀時。

父母存。苦賤貧。齏鹽蔬菽。日以奉親。父母逝。感遭際。錢刀錦綺。僅以營祭。東流滔滔。逝不回。西日宛宛。誰能追。行持形骸。入蒿萊。元堂幽局。永趨陪。

鵬六翮。難傳天。蟲百足。難陟巔。終爲人所嗤。不爲人所憐。

百步之內。必有嘉木。吾拜松竹。重其先拔俗。一林之中。必有飛翔。吾拜鳥鵲。重其不出鄉。一身之事。妻孥不詳。欲告我友。又苦各一方。百年之中。半不居里。惟蠹魚追隨。見我輒喜。

喜飲海水。喜食海魚。春夏卜居。無逾巨區。喜餐湖淥。喜采湖菱。秋冬讀書。宜傍禹陵。鏡不留物。影過卽滅。世不待人。事去卽陳。浮雲激電。生滅何速。視世以心。不視以目。

壬戌新正九日。吳封翁端彝等邀集世經堂看梅作。

昨夜羅浮月。微黃挂屋端。居然半間舫。釀足十分寒。殘葉樹頭墮。古香枝上探。花前兩年少。吹笛勸加餐。十八日偕陸孝廉繼輅莊上舍。會儀黃秀才載華。至城東橫舟亭探梅。回集卷施閣。小飲卽送孝廉北上。東風纔解凍。北風又飛雪。已傷青春遲。復與友生別。陸郎卅載同鄉里。早歲聲名日邊起。蝶夢莊周昨已醒。牛醫黃憲今誰比。三君一例皆少年。各矯健翮凌風前。流光真慨熟羊腍。壯志欲餐生麋肩。嗟余病已經時臥。五十五年彈指過。范睢脅向生前折。荀偃頭從夢中墮。閉門且學楊子元。精義一一離言詮。雪花

六出梅五出。日月右旋天左旋。因茲悟徹無生旨。大地春光亦如此。要從鸞燕識春秋。不與蜉蝣共生死。

燭光千頭淚百堆。日昨畫鷁從東來。

元夕城東咸豐壇有競渡之戲。

天門一笑卽飛電。地軸半拆驚轟雷。閒門卻倩梅花

守。掃徑惟應待良友。二頃雖無陽羨田。百壺且中山陰酒。東門之東花幾株。草根樹皮春已蘇。大姑城訪

東晉剎。少伯河接西洮湖。荆湘米價平難得。楚蜀軍書尙馳驛。燈火初回眼已青。干戈乍歇頭先白。八角

離門尺五汀。暫時分手若爲情。南行欲趁鳧溪棹。北上先題雁塔名。

將至洋川書院先詣郭北謁別先塋

經年方覺定羈魂。松柏蕭蕭謁墓門。已分頭顱行萬里。

昨歲蒙恩免死。遣戍伊犁。至戍所。將軍又欲行。亦荷聖恩以免。

僅留皮骨反孤

村。長愁擬共張平子。妙德慙無袁愍孫。揮淚更從原北望。鴉鵲聲裏上朝墩。

過東堤

已斷中江路。銀林五埧長。水難歸震澤。波轉突丹楊。別派分天塹。低圩減地糧。

五埧成。高淳諸縣遂爲澤國。前明遂奏減地租。派入

宜興荆溪等縣。臺濛遺事在。三復感滄桑。

花朝日阻風江口。望采石太白樓咫尺不得上。

今朝花朝無一花。今夕月夕亦無月。因之酒人無酒飲。空向酒仙樓畔歇。沉思往事心內傷。陳劉應徐均

已亡。謂三十年前學使署及沈太守業富署中諸賓客如邵學士晉涵高孝廉文照汪明經中諸人。我前同公謫夜郎。意外復得還江鄉。眼中千里與萬

里只坐沙洲慵不起。忘機雅有忘機伴。鴨鷓鷖絲飛不已。君不見、江源亦出昆侖中。往者險欲探奇蹤。伊
去昆侖不遠豈知勞人家住海東岸。江水過我始得東朝宗。犇馳歲月方三載。江水未移青鬢改。竹帛偏憐
壯志虛。乾坤剩有詩名在。二更月出斷厓口。遠道呼童復沽酒。花時雖無桃杏花。且向原南折新柳。

涇縣道中夜宿

春山一路幽蘭香。茱甲遠襯斜陽黃。藍輿時向杏梢度。薄暝尙欲穿層岡。一山初平一山出。怪石總從頭
上突。卻到山溪夜已闌。橋南一樹花如活。

過茹麻嶺

茹麻嶺南無隙地。麥隴盤盤上天際。青松陰裏紅杏花。波影日光微覺膩。疎疎一樹闌干右。燕剪未來蜂
已返。晴空復聞喚雨鳩。呪得一角陰雲浮。

行次桃花潭山店看杏花作

整整斜斜劇可憐。桃花潭側杏花妍。銷魂樓上三更雨。似畫江南二月天。小語未妨留睨睨。閒情只欲惹
鞦韆。慈恩回首眞如夢。露冷烟殘又十年。

山坑道中

雲乍離山日向晨。浣衣津口淨無塵。不知頭上花齊放。祇覺遊蜂戀美人。

抵洋川書院

來路雲已遮。去路山復塞。山禽亦分界。飛不妄南北。惟愁山外事。傳到此山側。預戒五尺童。不延山外客。追思荷戈地。亦有萬仞山。但覺白氣周。無此青鸞環。攤書向檐前。鳥語殊綿蠻。勞攘三十年。獲此一歲閒。生徒十數人。曙卽攬衣起。周廊聽書聲。都穿白雲裏。與談前世事。一一盡色喜。所愧學業荒。款門來不已。樓前半畝花。紅氣通八牖。朝霞復相間。赤白分左右。欣茲讀書暇。時亦陟岡阜。日昨山雨肥。園丁獻新韭。詠亭側海棠。

薄暝行山坳。花氣籠一谷。紅襟一雙燕。守此花畔宿。紅紅白白競半春。只此花態尤清淳。亦如名姝善守身。艷極不欲銷人魂。一花初開承一葉。葉上時時綴胡蝶。雲紅露白夜不眠。要看殘月來花前。曉起看梨花。

一白疑無影。亭亭物外斜。祇宜將曉月。襯此欲開花。飛瀑空相照。幽禽靜不譁。闌干兩三曲。何處著春華。山樓喜雨歌。

一月不雨憂三田。四山出雲高接天。雨聲似挾海潮至。一夜迸落山窗前。山中懸溜本數重。添出百道如飛龍。喧聲忽然入室中。欲挾床几淩虛空。漫空花雨尤堪訝。桃花李花成陣下。海棠可惜昨始開。連藥都飛北窗罅。園丁失喜農師幸。風伯差嫌煞風景。翻盆雨驟晴亦驟。北斗仍看挂松頂。沉思往事聲暗吞。憶

昨雨急趨烏孫。竄身無地得空穴。雷電又入披驚魂。雨行作雪夜若年。我僕尙滯南山巔。羊裘溼盡不得脫。指凍欲裂餓腸煎。卽今生還萬事足。況復眼前書可讀。雨聲風聲縱淩厲。足不下床頭戴屋。君不見雨餘溼翠復幾堆。曳杖更欲登層臺。老饕無端笑口開。明日驚筍登盤來。

山館靜坐憶孫大星衍。

戊戌年曾共隨學使者按臨過此縣境。

峽號壑澆澗響琴。卅年前事一追尋。巖腰柳尙凝青眼。谷口蘭真愜素心。偶爾塞翁悲失馬。依然山館仿來禽。舊遊十輩今誰在。最少如君白髮侵。

將至旌德趙兵備翼枉詩相餞未暇報也山館無事戲作長句柬之并約同遊黃山

逐臣初歸戀鄉土。日日醉眠腸欲腐。有花卽向花前飲。不問誰賓復誰主。少年英英丁與陸。

明經履恒孝廉繼輅。

宕文場氣頗粗。就中我敬西頭趙。七十高年健如虎。哦詩一字不相讓。往往雷霆雜吞吐。牡丹八首尤奇

絕。老筆轉能生媚嫵。百年文獻差不愧。一輩賓朋試重數。忘筌莊叟善高論。

中允通敏。荷鍤伯倫稱大戶。舍人召揚。

沈吳近又結詩社。

廣文元輅封君端彝。

劉蔣頻招宴花圃。

太守熊昌。地鎮恒。

賽神我憶月廿三。

去歲二月廿三日清明。

競渡人喧日端

五。波光已覺淨如綺。筆力復看強過弩。座中詩派判唐宋。壁上兵鋒看秦楚。危詞縱累十二碁。定律不差

分寸黍。便教長樂嚴刁斗。敢與淮陰鬪旗鼓。強梁幾欲扛周鼎。弱肉何堪試蕭斧。叢譏杜老作詩瘦。轉學

荀卿著書苦。此來百里程迢遞。實避千言氣莽鹵。仍攜季豹同趨塾。

時挈兒子符孫入塾。

未礙伯鸞居賃廡。萬山已

距南來轍。一屋祇開東向戶。三天子障肩堪並。五老人峯頭復俯。九華山距此不及二百里。雲光破曉嵌眉睫。清氣歷

時充肺腑。恥同詞伯競壇坫。可許散仙居洞府。狂遊尙未卜時日。鄙意終須待儕伍。我餐黃獨纔匝月。君

跨青驄去何所。

時聞有吳門之行。

名山欲入先鼓興。此老若來當步武。朱砂泉記仍可續。紅杏原詩不須補。緩程

水定由青弋。回路嶺仍登白紵。狂思策蹇升龍脊。醉或然犀燭牛渚。餘閒并可覓酒人。陳巡撫淮近寓居燕湖。得暇

未妨談食譜。君如爽約當有說。意必兩端持首鼠。蹤疲既畏行客笑。句劣或恐山靈侮。興公果係天機淺。

安石輒爲人事阻。縱然曳踵看山色。應悔埋頭住江潯。溪南帆席不肯挂。屋北降旗定須豎。歸時擲示一

巨編。讓我長歌擅今古。

登山半小閣

一開瞰四山。缺處望箬嶺。山坳一千戶。歷歷若居井。白雲穿入牖。曉夢尙難醒。幾家晨爨早。烟樓上山頂。烟光觸花氣。倏忽暗朝景。獨坐心轉清。憑闌試新茗。

山下訪友

門前古樹分向背。千枝百枝鳥聲碎。有時出屋不及冠。頭上白雲如可戴。興來欲訪溪南友。水鳥鷺絲分作隊。橋心甫過魚驚竄。瘦影亭亭嵌波內。南山雲晴北山暗。坐覺一窗殊顯晦。野人留客頗勤懇。手剪青青一畦菜。家貧不諱瓶無粟。舍北村南總堪賃。飯餘一晌眠初熟。倏忽怒雷喧水碓。竹中一徑穿曾慣。人

去鳥來都不礙。零星舊事談難竟。送過前溪步方退。爲言山僻有一龕。明日倘來堪晤對。侵曉送客過嶺。

孤帷隱一燈。行客尙未起。殘月下北山。寥寥犬初吠。一峯抱一峯。劣徑入隻騎。十里吹溼香。原空瀉花氣。

偶成

鳥聲不下樹。蛙聲不上山。夢醒聞衆聲。寥寥隔層關。前宵一雨山光綠。添得水聲飛上屋。三層閣倚百尺松。飽聽日午唵蒼龍。

連日風雨花事零落殆盡牡丹芍藥尙無消息感而有作卽示諸生

岡北岡南厭登涉。十日看花都作葉。風飄萬朵無一存。隔隴蔬花尙層疊。閒情幾日少歸束。春夢百番難妥帖。負暄行客乍脫綿。驟暖高齋欲搖箑。無端頃刻變晴雨。或者陰陽欠調變。名花縱謝柔桑嫩。樹上家家有蠶妾。攜壺挈榼上冢忙。劖土四邊封馬鬣。茶畦偏多麥畦少。久矣斯風盛宜歛。洋川書院挺山半。築屋居然象城堞。一瓶我尙遠借書。百里最慙爭負笈。閒繙左氏獲麟史。教做羲之換鵝帖。蜂腰終覺句可商。鳩舌半憐音不叶。九經四史孰淹貫。八體六書宜涉獵。百房燈影遙相射。半里書聲恍如接。埋頭已覺遙夜永。陟足偏欣上山捷。諸生英英志莫惰。春日遲遲睡防覺。何時便可放芍藥。此信定難瞞蛺蝶。花寬

十日五日約。香已千枝百枝衰。新蟾屈指黃半鉤。嫩蕊關心紅一捻。二分纔向枝頭吐。一朵誰先鬢邊貼。花前勸我頻攜酒。花下阿誰時步履。醉同山簡接羅倒。雨學郭公巾角墊。金罍總向人前瀉。玉笛須從樹頭摩。半街月霧籠衫袖。五色花光照眉睫。商量卻待榴火紅。青弋江應放歸楫。度嶺

一山初平一山起。更有一山生足底。怪峯稜稜都礙履。山鴉啼愁山鵲喜。翠柏青松淨如洗。山頭回身望山尾。來路都沉白雲裏。天梯初升石門啓。已隔下方三十里。

山樓曉望

花紅宜朝暾。花白宜曉月。梨花尙帶殘月光。一樹棠梨已迎日。人家分住東西嶺。菜甲作花連十頃。平田雨後飛溼光。雲朵亦與花爭黃。

微雨

天半浮雲過。山頭暗一重。早涼開北牖。微雨入前峯。已度三層澗。全迷萬壑松。冥濛看飛鳥。歸樹尙從容。山行

添衣欲出門。日色驟晴煦。濛濛北原上。春氣零若雨。斜穿松櫟徑。百鳥頭上語。草花三兩種。曲折礙芒屨。前渡淺水灘。牽衣待儔侶。

三月三日憶里中雲溪諸勝

今晨三月三。禁烟亦此日。風花無一朵。清冷值佳節。攜樽上高阜。轉覺鄉思切。遙憐池館好。疎雨亦將歇。北郭展嫩晴。雙橋上新月。應有挑菜人。延回出城闕。

我家白雲溪。雲白溪亦漲。一鳥溪上鳴。千花樹頭放。近移東半里。築屋轉相向。春來倘無夢。夢輒在溪上。樓前楊柳樹。闌牖可閒望。花落溪水深。春人定惆悵。

郁李

階前郁李多。只惜花瑣碎。沉沉春晝影。迷客有如醉。幽蘭獨高格。開尙與人背。梨花嫣然姿。亦出桃李內。庶幾顏色淡。蜂蝶所不愛。三春孰蹤跡。一客獨盼睞。欣然攜茗具。晴晝看至晦。詎忍折一枝。夜窗仍晤對。半山看雨

雨聲欲走北。風力欲挽西。遂令一谷雲。分向西北飛。風驚西來雨。北走天頂依然挂。星斗風聲雨聲入夜昏。鳥歸人歸爭一門。君不見。歸人歸鳥何太急。鳥亦有巢人有笠。

大風拔木歌寒食前一日

危亭不合皆畫龍。怪底拔宅思騰空。爪牙森森頭角挺。惹得天龍下窺影。雨聲飛完復飛雹。風力驟回先拔木。飛泉如濤響空谷。餘勢尙摧花與竹。晝耶真耶不可知。但見半壁雲分馳。雷聲亦自屋中劈。照見鱗

甲光參差。江南山高。水復闊。幽處盡爲龍所窟。以龍招龍。龍卽出。或者真龍怪唐突。黃山之西白嶽東。勸翁掃壁更畫高高峯。不爾龍挾此屋飛入雲當中。

寒食偶成

伊犁河上值清明。東距關門尙百程。今日萬山深處坐。雨花如夢撲簾旌。誰向洋川紀歲華。沿門都已採新茶。山中春事忙如許。桃李先開半月花。日午山窗睡起遲。東風吹夢入遊絲。愁無一架秋千影。閒煞滿庭紅杏枝。衰遲未敢說春愁。根觸鶯花憶舊遊。只有白雲知我意。隨風都到海東頭。

偕諸生至下洋川修禊各賦一首

我來已半月。未及洋水濱。茲逢禁烟節。又值上巳辰。諸生學經時。用志已不紛。相攜勝地來。驗此心賞真。聯行亦無多。童冠八九人。牽衣過石橋。酌蠡向水潯。頗感歲月馳。奄忽及暮春。吾徒勤讀書。尤在志行純。心性苟不漓。追計泰與屯。朱雲折安昌。其氣尙未馴。及對辭贛君。品乃絕等倫。寥寥一千年。冀欲追絕塵。狂狷致失中。又恐戾聖門。同堂貴參稽。得聞盍共陳。歸及新月輝。陶然飲芳尊。

清明日望遠

三更白雲四更雨。踏青人聽更殘鼓。鼓聲纔絕人聲擾。已見春衫度林杪。濛濛松竹徑尙昏。春燕亦復隨

春人風光縱好春人訝。似怨桃花已先謝。山中一歲止一來。棠棣枝下仍徘徊。一句春鬢無顏色。卻戴幽蘭露猶滴。洋川曲折徑亦斜。沿路喜尋親串家。滿裙春水年年好。只惜紅顏鏡中老。

階前艸花黃白可愛爲賦一絕

黃黃白白滿窗紗。破悶聊拈午後茶。從此不嫌風景淡。草花能替樹頭花。

清明日憶女紡孫卻寄

小白長紅幾樹桃。嫩黃淺碧柳條條。春光偶到三層閣。客夢頻牽八字橋。壻可學文愁病肺。兒能涉筆幸

垂髫。

謂符孫

他時卜宅烏衣巷。

時得孫大季仇札約買宅共住江寧故云

門外山光卽六朝。

偶成

校得南華內外篇。晚春已覺日如年。新紅看罷看新綠。正是江南麥秀天。

夜起

尋詩似厭春晝忙。三更起行百尺廊。紅蘭花前月尤皎。白鷺影外天何長。樓臺密處欄干複。北斗正垂闌北曲。水西一燈行不休。夜半已到山南頭。款門殷殷人不識。失喜偏逢寄書客。山深不及羅酒漿。飯客祇有蔬花黃。主人將眠客復起。欲到縣中還卅里。

水北三松歌

日日樓上看三松。今日甫向松根過。亭亭拔地百餘丈。遠望仍疑水邊臥。松邊一橋亦千步。橋盡松根始全露。盤空天矯不可名。一半橫遮水南路。松梢沉沉足烟霧。白鶴不來棲白鷺。一枝北出勢更奇。罩得樓臺復無數。五松中間兩已枯。間向岸北尋根株。移南倘復十數武。老榦直欲捎浮圖。霜皮一尺裂一縫。堆得苔錢已無空。風聲雷聲昨倥偬。龍欲出山雷雨踵。倒海排山浪齊湧。只有此松兀不動。攫擎星辰疑有力。回轉陰陽不踰刻。根株盤盤穿入石。透出石中枝尙直。松聲近樹反不聞。數里外覺驚濤奔。鄰翁下見五代孫。自說輩行無松尊。愛之不忍手撫玩。一月幾回來斷岸。君不見。四山中間人跡斷。此客此松聊作伴。

暮窗看霧

分半山坡枕水涯。讀書樓上一燈斜。怪來眼界空如許。白霧漫漫蓋萬家。

望遠

挑菜湔裙總未曾。半旬常自睡瞢騰。小桃落盡春無夢。雙燕歸遲夜有燈。舊友許貽京口酒。新詩都寫剡溪藤。惟餘望遠心偏切。月黑高樓上幾層。

山杜鵑

十日不出戶。杜鵑紅滿山。始知造化功。足補春事殘。紫藤亦牽花。掩映松竹間。胡蝶去已久。何時復飛還。

曳杖一縱觀。花露衣上班。側聞鄰翁言。消息到牡丹。有此匝月紅。庶可待藥欄。

山中

山中雨半宵。三日足清響。蛙鼓亦上山。寥寥非意想。

卽事

山雲朵朵欲凌空。罩得山花處處紅。自覺著書心地徹。不知身在白雲中。

雨夜友人過訪友涇縣人

竹笠芒屨猛叩關。匆匆知自震州還。故人欲話三年事。積雨先沉四面山。勸客酒杯心轉怯。照人燈火鬢

初班。離家早已忘家累。擬築幽居水乙灣。所居水西山水尤勝

洋河橋題柱

洋川三面是人家。到得橋頭路已叉。卻趕牯牛山北去。不教喫盡野田花。

題士女遊春圖

白白紅紅艸亦香。且扶新月過橋梁。春光似海人如海。不避遊人說大方。羅衫葉葉趁春遊。竹粉時時拂面流。摘得菜花何處用。嫩黃先襯玉搔頭。黃蜂何處覓遊蹤。欲上層梯意轉慵。拂面遊絲已無數。第三層塔且從容。